

四庫全書

集部

欽定四庫全書

集部

唐文粹卷十二

詳校官庶吉士_臣謝恭銘

助教_臣常循覆勘

總校官檢討_臣何思鈞

校對官編修_臣盧遂

謄錄監生_臣任銜萱

欽定四庫全書

唐文粹卷十二

詩丙 摠八十六首

樂府辭上

功成作樂一

七德舞 白居易

古樂三

宋
姚鉉
編

湘絃怨

孟郊

筵篴引

王昌齡

筵篴謠

李白

感慨六

放歌行

王昌齡

浩歌行

白居易

緩歌行

李頎

短歌行

李白

短歌行

張籍

善哉行

釋貫休

興亡四

祖龍行

韋楚老

鄴都引

張說

永嘉行

張籍

後魏行

王穀

幽怨十二

湘妃怨

陳羽

銅雀臺歌

劉長卿

銅雀妓

歐陽詹

魏宮詞

崔國輔

王昭君歌

劉長卿

王昭君

盧照鄰

婕妤怨

王維

長信宮

崔國輔

怨詞

苦樂相倚曲

元稹

妾薄命

李白

白頭吟

張籍

貞節六

列女操

孟郊

節婦吟寄東平李司空

張籍

織女詞

元稹

靜女詞

孟郊

寄衣曲

張籍

白紵歌

愁恨十

征婦怨

張籍

春思

李白

春別曲

張籍

古樂府雜怨三首

孟郊

長干行

李白

古薄命妾

孟郊

母別子

白居易

夜夜曲

釋貫休

艱危十一

蜀道難

李白

行路難

張籍

行路難三首

李白

變行路難

王昌齡

太行路

白居易

梁甫吟

李白

走馬引

李賀

孟門行

崔顥

沐浴子

李白

邊塞三十三

將軍行

劉希夷

將軍行

張籍

霍將軍

崔顥

老將行

王維

鴈門太守行

李賀

從軍行六首

劉長卿

塞上曲

戎昱

塞下曲

郎士元

塞下曲

王季友

出塞曲

劉灣

燕歌行

高適

燕支行

王維

隴頭吟

陰山道

白居易

行行遊且獵篇

李白

飲馬長城窟

釋子蘭

關山月

張籍

古長城吟

王翰

長城作

鮑溶

古築城曲五首

元稹

築城詞

張籍

築城詞二首

陸龜蒙

聽董大彈胡笳聲兼語弄寄房給事

李頎

七德舞

白居易

七德舞七德歌傳自武德至元和元和小臣白居易觀

舞聽歌知樂意曲終稽首陳其事太宗十八舉義兵白旄黃鉞定兩京擒充戮竇四海清二十有四功業成二十有九即帝位三十有五致太平功成理定何神速速在推心致人腹亡卒遺骸散帛收貞觀初詔收天下陣亡者致祭而瘞之尋又散金帛飢人賣子分金贖貞觀二年大饑人有賣男而購埋之飢人賣子分金贖貞觀二年大饑人有賣男而購埋之之以還魏徵夢見天子泣魏徵疾至太宗夢與徵別既寤流涕是夕徵卒故御製碑其父母魏徵夢見天子泣魏徵疾至太宗夢與徵別既寤流涕是夕徵卒故御製碑文云昔殷高宗得良弼於夢中朕今失賢臣於覺後張謹哀聞辰日哭張公謹卒太宗為之舉哀有司奏曰陰陽所忌辰日不哭太宗曰君臣義重猶父子也情發於衷安知辰日乃哭之怨女三千

放出宮

太宗嘗謂侍臣曰婦人幽閉深宮情實可愍今將出之任求伉儷於是令左丞戴胄給事中杜

正倫於掖庭揀出數千人盡放歸也

死囚四百來歸獄

貞觀六年親錄囚徒死罪者三百九

十人放歸于家令明年秋來就刑及期而至遂詔悉原之

剪鬚燒藥賜功臣李勣嗚

咽思殺身

李勣疾亟醫云得龍鬚灰方可療之太宗自翦鬚燒灰賜之服訖而愈勣叩頭泣涕而謝

含血吮瘡撫戰士思摩奮呼乞効死

李思摩嘗中弩太宗親為之吮血

則知不獨善戰善乘時以心感人人心歸爾來一百九

十載天下至今歌舞之歌七德舞七德聖人有作垂無

極豈徒耀神武豈徒誇聖文太宗意在陳王業王業艱

難示子孫

湘絃怨

孟郊

昧者治春草蕭蘭同一鋤
盲颺怨秋林曲直同一枯
嘉禾忌深蠹直人悲巧誣
靈均入迴流靳尚為良謨
願我分衆泉清濁各有渠
願我分衆巢泉鸞相遠居
此志諒難保此意誠何如

瑩篴引

王昌齡

盧谿郡南夜泊舟夜聞南岸羌戎謳其時月黑猿啾啾

微雨露衣令人愁有一遷客登高樓不言不寐彈箏篴
彈作薊門桑葉秋風沙颯颯青塚頭將軍鐵駝汗血流
深入匈奴戰未休黃旗一點兵馬收亂殺胡人積如邱
瘡病驅來配邊州仍披漠北羊羔裘顏色飢枯掩面羞
眼眶滴淚深兩眸還思本鄉食糲牛欲語不得指咽喉
或有強壯能呻吟意說被他邊將讎五世屬蕃漢主留
碧毛氈帳河曲遊索駝五萬部落稠勅賜飛鳳金兜鍪
為君百戰如過籌靜掃陰山無鳥投家藏鐵券特承優

黃金千斤不稱求九族分離作楚囚深溪寂寞絃苦幽
草木悲感聲颼颼僕本山東為國憂明光殿前論九疇
麓讀兵書盡冥搜為君掌上施權謀洞曉山川無與儔
紫宸發詔遠懷柔搖筆飛霜如奪鉤鬼神不得知其由
憐愛蒼生比蚍蜉緣河屯兵須漸抽盡遣降來拜御溝
便令海內休戈矛何用班超定遠侯史臣書之得已不

筌篴謠

李白

攀天莫登龍走山莫騎虎貴賤結交心不移唯有嚴陵

與光武周公稱大聖管蔡寧相容漢謠一斗粟不與淮
南春兄弟尚路人吾心安所從他人方寸間山海幾千
重輕言託朋友對面九疑峯多花必早落桃李不如松
管鮑久已死何人繼其蹤

放歌行

王昌齡

南渡洛陽津西望十二樓明堂坐天子月朔朝諸侯清
樂動千門皇風披九州慶雲從東來決瀦抱日流昇平
貴論道文墨將何求有詔徵草澤微誠獻謀猷冠冕如

星羅拜揖曹與周望塵非君事入賦且遲留幸蒙國士
識因脫負薪裘今者放歌行以慰梁甫愁但營數斗祿
奉養每豐羞若得金膏遂飛雲亦可儔

浩歌行

白居易

天長地久無終畢昨夜今朝又明日鬢髮蒼浪牙齒疎
不覺身年四十七前去五十有幾年把鏡照面心忙然
既無長繩繫白日又無大藥駐朱顏朱顏日夜不如故
青史功名在何處欲留年少待富貴富貴不來年少去

去復去兮如長河東流赴海無迴波
賢愚貴賤同歸盡
北邙塚墓高嵯峨古來如此非獨我
未死有酒且高歌
顏回短命伯夷餓我今所得亦已多
功名富貴須待命
命若不來知柰何

緩歌行

李頎

小來託身攀貴遊傾財破產無所憂
暮擬經過石渠署
朝將出入銅龍樓結交杜陵輕薄子
謂言可生復可死
一沉一浮會有時棄我翻然如脫屣
男兒立身須自強

十年閉戶穎水陽業就功成見明主擊鍾鼎食坐華堂
二八蛾眉梳墮馬美酒清歌曲房下文昌宮中賜錦衣
長安陌上退朝歸五陵賓從莫敢視三省官僚揖者稀
早知今日讀書是悔作從來狂俠兒

短歌行

李白

白日何短短百年苦易滿蒼穹浩茫茫萬劫太極長麻
姑垂兩鬢一半已成霜天公見玉女大笑億千場吾欲
攬六龍迴車挂扶桑北斗酌美酒勸龍各一觴富貴非

所願為人駐顏光

短歌行

張籍

青天蕩蕩高且虛，上有白日無根株。
流光暫出還入地，使我少年不須臾。
與君相逢勿寂寞，衰老不復如今樂。
玉卮盛酒置君前，再拜願君千萬年。

善哉行

釋貫休

有美一人兮，婉如清揚。
識曲別音兮，令姿煌煌。
繡袂捧琴兮，登君子堂。
如彼萱草兮，使我憂忘。
欲贈之以紫玉。

尺白銀鐺久不見之兮湘水茫茫

祖龍行

韋楚老

黑雲兵氣射天裂壯士朝昏夢寃結祖龍一夜死沙邱
胡亥空隨鮑魚轍腐肉偷生二千里偽書先賜扶蘇死
墓接驪山土未乾瑞光已向芒碭起陳勝城中鼓三下
秦家天地如崩瓦龍蛇撩亂入咸陽少帝空隨漢家馬

鄴都引

張說

君不見魏武草創爭天祿羣雄睚眦相馳逐畫攜壯士

破堅陣夜接詞人賦華屋都邑繚繞西山陽桑榆漫漫
漳河曲城郭為墟人改代但見西園明月在鄴傍高塚
多貴臣蛾眉曼睂共灰塵試上銅臺歌舞處唯有秋風
愁殺人

永嘉行

張籍

黃頭鮮卑入洛陽胡兒持戟昇明堂晉家天子作降虜
公卿齊走如牛羊紫陌旌旛暗相觸家家雞犬驚上屋
婦人出門隨亂兵夫死眼前不敢哭九州諸侯自顧土

無人領兵來護主北人避胡多在南南人至今能晉語

後魏行

王 載

力微皇帝謗天嗣太武凶殘人所畏一朝拈毬飛上天
子孫盡作河魚餌

湘妃怨

陳 羽

二妃愁處雲沉沉二妃怨處湘江深商人酒滴廟前草
蕭颯風生斑竹林

銅雀臺歌

劉長卿

嬌愛更何日高臺空數層含啼映雙袖不忍看西陵漳
河東流無復來百花輦路唯蒼苔青樓月夜長寂寞碧
雲日暮空徘徊君不見鄴中萬事非昔時古人何在今
人悲春風不逐君王去草色年年舊宮路宮中歌舞已
浮雲空指行人往來處

銅雀妓

歐陽詹

蕭條登古臺迴首黃金屋落葉不歸林高陵永為谷粧
容徒自麗舞態閱誰目惆悵總帷前歌聲苦於哭

魏宮詞

崔國輔

朝日點紅粧擬上銅雀臺畫眉猶未竟魏帝使人催

王昭君歌

劉長卿

自矜妖艷色不顧丹青人那知粉纈能相負却使容華
翻誤身上馬辭君嫁驕虜玉顏對人啼不語北風鴈急
浮雲秋萬里獨見黃河流纖腰不復漢宮寵雙蛾長向
胡天愁琵琶絃中苦調多蕭蕭羌笛聲相和誰憐一曲
傳樂府能使千秋傷綺羅

王昭君

盧照鄰

合殿恩中絕
交河使漸稀
肝腸辭玉輦
形影向金徽
漢宮草應綠
胡庭沙正飛
願逐三秋鴈
年年一度歸

婕妤怨

王維

宮殿生秋草
君王恩幸疎
那堪聞鳳吹
門外度金輿

長信宮

崔國輔

長信宮中草
年年愁處生
時侵珠履跡
不使玉階行

怨詞

妾有羅衣裳秦王在時作為舞春風多秋來不堪著

苦樂相倚曲

元稹

古來苦樂之相倚近於掌上之十指君心半夜猜恨生
荊棘滿懷天未明漢皇眼瞥飛燕時可憐班女思已衰
未有因由相決絕猶得半年佯暖熱轉將深意喻傍人
緝綴疵瑕遣潛說一朝詔下辭金屋班姬自痛何倉卒
呼天拊地將自明不悟尋時暗銷骨白首宮人前再拜
願將日月相揮解苦樂相尋晝夜聞燈光那得天明在

主今被奪心應苦妾奪深恩初為主欲知妾意恨主時
主今為妾思量取班姬收淚抱妾身我曾排擯無限人

妾薄命

李白

漢帝重阿嬌貯之黃金屋咳唾落九天隨風生珠玉寵
極愛還歇妬深情却踈長門一步地不肯暫迴車雨落
不上天水覆難再收君情與妾意各自東西流昔日笑
蓉花今成斷根草以色事他人能得幾時好

白頭吟

張籍

請君膝上琴彈我白頭吟憶昔君前嬌笑語兩情宛轉
如縈素宮中為我起高樓更開花池種芳樹春天百草
秋始衰棄我不待白頭時羅襦玉珥色未暗今朝已道
不相宜揚州青銅作明鏡暗中持照不見影人心迴互
自無窮眼前好惡那能定君恩已去若再返菖蒲花青
月長滿

列女操

孟郊

梧桐相待老鴛鴦會雙死貞女貴殉夫捨生亦如此波

瀾誓不起妾心井中水

節婦吟寄東平李司空

張籍

君知妾有夫贈妾雙明珠感君纏綿意繫在紅羅襦妾
家高樓連苑起良人執戟明光裏知君用心如日月事
夫誓擬同生死還君明珠雙淚垂何不相逢未嫁時

織女詞

元稹

織婦何太忙蠶經三卧行欲老蠶神女聖早成絲今年
絲稅抽徵早早徵非是官人惡去歲官家事戎索征人

戰苦東刀瘡主將勲高換羅幕縹絲織帛猶努力變縹
擦機苦難織東家頭白雙女兒為解挑紋嫁不得余掾
荆時
目擊貢綾戶有
終老不嫁之女簷前裊裊游絲上有蜘蛛巧來往羨
他蟲豸解緣天能向虛空織羅網

靜女詞

孟郊

豔女皆妬花靜女獨撿蹤任體恥任粧嫁德不嫁容君
子未求娉小人難相從此志誰與說琴絃幽韻重

寄衣曲

張籍

織素縫衣獨苦辛
遠因迴使寄征人
官家亦自寄衣去
貴從妾手著君身
高堂姑老無侍子
不能自到邊城裏
殷勤為看初著時
征人身上宜不宜

白紵歌

張籍

皎皎白紵白且鮮
將作春衣稱少年
裁縫長短不能定
自持刀尺向姑前
復恐蘭膏污纖指
常遣傍人收墮珥
衣裳著時寒食下
還把玉鞭鞭白馬

征婦怨

張籍

九月匈奴殺邊將漢軍全歿遼水上萬里無人收白骨
家家城下招魂葬婦人依倚子與夫同居貧賤心亦舒
夫死戰場子在腹妾身雖存如晝燭

春思

李白

燕草如碧絲秦桑低綠枝當君懷歸日是妾斷腸時春
風不相識何事入羅帷

春別曲

張籍

長江春水綠堪染荷葉出水大如錢江頭橘樹君自種

那不長繫木蘭船

古樂府雜怨三首

孟郊

天桃花清晨遊女紅粉新
天桃花薄暮遊女紅粉故
樹有百度花人無一定顏
花送人老盡人悲花自閑
貧女鏡不明寒日花少容
暗蛩有虛織短線無長縫
浪水不可照狂夫不可從
浪水多散影狂夫多異蹤
持此一生薄空成萬恨濃

憶人莫至悲至悲空自衰
寄人莫剪衣剪衣未必歸
朝

為雙蒂花暮為四散飛落花却遶樹遊子不顧期

長干行

李白

妾髮初覆額折花門前劇郎騎竹馬來遶床弄青梅同
居長千里兩小無嫌猜十四為君婦羞顏未嘗開低頭
向暗壁千喚不一迴十五始展眉願同塵與灰常存抱
柱信豈上望夫臺十六君遠行瞿塘濫瀕堆五月不可
觸猿鳴天上哀門前舊行跡一一生蒼苔苔深不可掃
落葉秋風早八月胡蝶黃雙飛西園草感此傷妾心坐

愁紅顏老早晚下三巴預將書報家相迎不道遠直至
長風沙

古薄命妾

孟郊

不惜十指絃為君千萬彈常恐新聲至坐使舊聲殘棄
置今日悲即是昨日歡將新變故易持故為新難青山
有蘼蕪蕪葉長不乾空今後世人採掇幽思攢

母別子

白居易

母別子子別母白日無光哭聲苦關西驃騎大將軍去

年破虜新策勲勅賜金錢二百萬洛陽迎得如花人新人迎來舊人棄掌上蓮花眼中刺迎新棄舊未足悲悲在君家有兩兒一始扶行一初坐坐啼行哭牽人衣以爾夫妻新嫵婉使我母子生別離不如林中鳥與鵲母不失雛雄伴雌又似園中桃與李花落隨風子在枝新人新人聽我語洛陽無限紅樓女但願將軍重立勲更有新人勝於汝

夜夜曲

釋貫休

蟋蟀切切風騷騷芙蓉噴香蟾蜍高孤燈耿耿征婦勞
更深撲落金錯刀

蜀道難

李白

噫噓噓危乎高哉蜀道之難難於上青天蠶叢及魚鳧
開國何茫然爾來四萬八千歲不與秦塞通人煙西當
太白有鳥道可以橫絕峨眉巔地崩山摧壯士死然後
天梯石棧相勾連上有橫河斷海之浮雲下有衝波逆
折之迴川黃鶴之飛尚不能過猿猱欲度愁攀緣青泥

何盤盤百步九折縈巖巒捫參厯井仰脅息以手拊膺
坐長歎問君西遊何當還畏途巉巖不可攀但見悲鳥
號枯木雄飛雌呼遶林間又聞子規啼夜月愁空山蜀
道之難難於上青天使人聽此凋朱顏連峰去天不盈
尺枯松倒挂倚絕壁飛湍瀑流爭喧廝砢崖轉石萬壑
雷其險也若此嗟爾遠道之人胡為乎來哉劍閣崢嶸
而崔嵬一夫當關萬夫莫開所守或匪親化為狼與豺
朝避猛虎夕避長蛇磨牙吮血殺人如麻錦城雖云樂

不如早還家蜀道之難難於上青天側身西望長咨嗟

行路難

張籍

湘東行人長歎息十年離家歸未得弊裘羸馬苦難行
僮僕盡饑少筋力君不見床頭黃金盡壯士無顏色龍
蟠泥中未有雲不能生彼昇天翼

行路難 三首

李白

金樽清酒斗十千玉盤珍羞直萬錢停盃投箸不能食
拔劍四顧心茫然欲渡黃河水塞川將登太行雪暗天

閒來垂釣坐谿上忽復乘舟夢日邊行路難行路難多
岐路今安在長風破浪會有時直挂雲帆濟滄海

大道如青天我獨不得出羞逐長安社中兒赤雞白狗
賭梨栗彈劍作歌奏苦聲曳裾王門不稱情淮陰市井
笑韓信漢朝公卿忌賈生君不見昔時燕家重郭隗擁
簪折節無嫌猜劇辛樂毅感恩分輸肝剖膽効英才昭
王白骨縈蔓草誰人更掃黃金臺行路難歸去來

有耳莫洗潁川水有口莫食首陽蕨含光混世貴無名

何用孤高比雲月吾觀自古賢達人功成不退皆隕身
子胥既棄吳江上屈原終投湘水濱陸機雄才豈自保
李斯稅駕苦不早華亭鶴唳誰可聞上蔡蒼鷹何足道
君不見吳中張翰稱達生秋風忽憶江東行且樂生前
一盃酒何須身後千載名

變行路難

王昌齡

向晚橫吹悲風動馬嘶合前驅引旌節千里陣雲匝單
于下陰山砂礫空颼颼封侯取一戰豈復念閨閣

太行路

白居易

太行之路能摧車若比君心是坦途
巫峽之水能覆舟若比君心是安流
君心好惡苦不常好生毛髮惡生瘡
與君結髮未五載豈期牛女為參商
古稱色衰相棄背當時美人猶怨悔
何況如今鸞鏡中妾顏未改君心改
為君薰衣裳君聞蘭麝不馨香為君
盛容飾君看珠翠無顏色行路難難
重陳人生莫作婦人身百年苦樂由
他人行路難難於山險於水不獨人
間夫與妻近代君

臣亦如此君不見左納言右納史朝承恩暮賜死行路
難行路難不在水不在山祇在人情反覆間

梁甫吟

李白

長嘯梁甫吟何時見陽春君不見朝歌屠叟辭棘津八
十西來釣渭濱羞白髮照清水逢時吐氣思經綸廣
張三千六百鈞風雅暗與文王親大賢虎變愚不測當
年頗似尋常人君不見高陽酒徒起草中長揖山東隆
準公一開遊說騁雄辯兩女輟洗來趨風東下齊城七

十二指麾楚漢如旋蓬狂生落魄尚如此何況壯士當
羣雄我欲攀龍見明主雷公砰訇震天鼓帝傍投壺多
玉女三時大笑開電光倏爍晦冥起風雨閭闔九門不
可通以額叩闕閭者怒白日不照吾精誠杞國無事憂
天傾猊獠磨牙競人肉騶虞不折生草莖手接飛猱搏
彫虎側足焦原未言苦智者可卷愚者豪世人見我輕
鴻毛力排南山三壯士齊相殺之費二桃吳越無劇孟
亞夫哈爾為徒勞梁甫吟聲正悲張公兩龍劍神物合

有時風雲感會起居釣大人岷岷當安之

走馬引

李賀

我有辭鄉劍玉鋒堪截雲襄陽走馬使意氣自生春朝
嫌劍花淨暮嫌劍光冷能持劍向人不解持照身

孟門行

崔顥

黃雀銜黃花翩翩傍簷隙本擬報君恩如何反彈射金
壘美酒滿座春平原愛財多衆賓滿堂盡是忠義士何
意得有讒諛人諛人翻覆那可道能令君心不自保北

園新種桃李枝根株未固何轉移成陰結子君自取若
問傍人那得知

沐浴子

李白

沐芳莫彈冠浴蘭莫振衣處世忌太潔志人貴藏輝滄
浪有釣叟吾與爾同歸

將軍行

劉希夷

將軍闔轅門耿介當風立諸將欲言事逡巡不敢入劍
氣射雲天鼓聲破原隰黃塵塞路起走馬追兵急彎弓

從此去飛箭如雨集截圍一百里斬首五千級代馬流血死胡人抱鞍泣古來養甲兵有事常討襲乘我廟堂運坐使干戈戢獻凱歸帝京軍容何翕習

將軍行

張籍

彈箏峽東有胡塵天子擇日拜將軍蓬萊殿前賜六纛還領禁兵為部曲當朝受詔不辭家夜向咸陽原主宿戰車彭彭旌旗動三十六軍聲上隴隴頭戰勝夜亦行分兵處處收舊城胡兒殺盡陰磧暮擾擾唯有牛羊聲

邊人親戚曾戰歿今逐官軍收舊骨殖西行見萬里空
樂府獨奏將軍功

霍將軍

崔顥

長安甲第高入雲誰家居住霍將軍日晚朝迴擁賓從
路旁揖拜何紛紛莫言炙手手可熱須臾火盡灰亦滅
莫言貧賤即可欺人生富貴自有時一朝天子賜顏色
世上悠悠應自知

老將行

王維

少年十五二十時步行奪取胡馬騎射殺中山白額虎
肯數鄴下黃鬚兒一身轉戰三千里一劒曾當百萬師
漢兵奮迅如霹靂虜騎崩騰畏蒺藜衛青不敗由天幸
李廣無功緣數奇自從棄置便衰朽世事蹉跎成白首
昔時飛箭無全目今日垂楊生左肘路傍時賣故侯瓜
門前學種先生柳茫茫古木連窮巷寥落寒山對虛牖
誓令疎勒出飛泉不似潁川空使酒賀蘭山下陣如雲
羽檄交馳日夕聞節使三河募年少詔書五道出將軍

試拂鐵衣如雪色聊持寶劍動星文願得燕弓射大將
恥令越甲鳴吾君莫嫌舊日雲中守猶堪一戰取功勲

鴈門太守行

李賀

黑雲墜城城欲摧甲光向日金鱗開角聲滿天秋色裏
塞上燕支凝夜紫半卷紅旗臨易水霜重鼓聲寒不起
報君黃金臺上意提攜玉龍為君死

從軍行六首

劉長卿

迴首虜騎合城下漢兵稀白刃兩相向黃雲愁不飛手

中無尺鐵徒欲穿重圍

落日更蕭條北風動枯草將軍追虜騎夜失陰山道戰
敗仍樹勲韓彭但空老

草枯秋塞上望見漁陽郭胡馬嘶一聲漢兵淚雙落誰
為吮癰者此事令人薄

目極鴈門道青青邊草青一身事征戰及馬同辛勤末
路成白首功歸天下人

倚劒白日暮望鄉登戍樓北風吹羌笛此夜關山愁迴

首不無意滄河空自流

黃沙一萬里白首無人憐報國劒已折歸鄉身幸全單
于古臺下邊色寒蒼然

塞上曲

戎昱

樓上畫角哀即知兵心苦試問左右人無言淚如雨何
意休明時終年事鼙鼓

塞下曲

郎士元

寶刀塞下兒身經百戰曾百勝壯心竟未嫖姚知白草

山頭日初沒黃沙城下歌聲發蕭條夜靜邊風吹獨倚
營門望秋月

古塞曲

王季友

進軍飛狐北窮寇勢將變日落沙塵昏背河更一戰
駢馬黃金勒雕弓白羽箭射殺左賢王歸奏未央殿
欲言塞下事天子不召見東出咸陽門哀哀淚如霰

出塞曲

劉灣

將軍在重圍音信絕不通羽檄如流星飛入甘泉宮
倚

是并州兒少年心膽雄一朝隨召募百戰爭王公去年
桑乾北今年桑乾東死是征人死功是將軍功汗馬牧
秋月疲卒卧霜風仍聞左賢王更欲圍雲中

燕歌行

并序

高適

開元十年客有從御史大夫張公出塞而還者作燕歌
行以示適感征戍之事因而和焉

漢家煙塵在東北漢將辭家破殘賊男兒本自重橫行
天子非常賜顏色擬金伐鼓下榆關旌旗逶迤碣石間

校尉羽書飛瀚海單于獵火照狼山山川蕭條極邊土
胡騎憑凌雜風雨戰士軍前半死生美人帳下猶歌舞
大漠窮秋塞草衰孤城落日鬪兵稀身當恩遇恒輕敵
力盡關山未解圍鐵衣遠戍辛勤久玉筋應啼別離後
少婦城南欲斷腸征人薊北空迴首邊風飄飄那可度
絕域蒼茫何所有殺氣三時作陣雲寒聲一夜傳刁斗
相看白刃血紛紛死節從來豈顧勲君不見沙場征戰
苦至今猶憶李將軍

燕支行

王維

漢家天將才且雄，來時謁帝明光宮。
萬乘親推雙闕下，千官出餞五陵東。
誓辭甲第金門裏，身作長城玉塞中。
衛霍纔堪一騎將，朝廷莫數貳師功。
趙魏燕韓多勁卒，關西俠少何咆勃。
報讎只是聞嘗膽，飲酒不曾妨刮骨。
畫戟琱戈白日寒，連旗大旆黃塵沒。
疊鼓遙翻瀚海波，鳴笳亂動天山月。
麒麟錦帶佩吳鉤，颯沓青驪躍紫騮。
拔劍已斷天驕臂，歸鞍共飲月支頭。
漢兵大呼一當百。

虜騎相看哭且愁，教戰雖令赴湯火。終知上將先伐謀。

隴頭吟

長城少年遊俠客，夜上戍樓看太白。隴頭明月迴臨關。
隴上行人夜吹笛，關西老將不勝愁。駐馬聽之雙淚流。
身經大小百餘戰，麾下偏裨萬戶侯。蘇武纔為典屬國，
節毛空盡海南頭。

陰山道

白居易

陰山道，陰山道。紆邏敦，肥水泉。好每至，戎人送馬時。道

傍千里無纖草草盡泉枯馬病羸飛龍但印骨與皮五十疋練易一疋練去馬來無了日養無所用土非宜每歲死傷十六七練絲不足女工苦踈織短裁充疋數藕絲蛛網三大餘迴鶻訴稱無用處咸安公主號可敦遠為可汗頻奏論元和二年下新勅內出金帛酬馬直仍詔江淮馬價練從此不令踈短織合羅將軍呼萬歲捧授金銀與練絲誰知黠虜啓貪心明年馬來多一倍練漸好馬漸多陰山虜柰爾何

行行遊且獵篇

李 白

邊城兒生年不讀一字書但將遊獵誇輕趨胡馬秋肥
宜白草騎來躡影何矜驕金鞭拂雪揮鳴鞘半酣呼鷹
出遠郊弓彎滿月不虛發雙鷁迸落連飛鶻海邊觀者
皆辟易猛氣英風振沙磧儒生不及遊俠人白首下帷
復何益

飲馬長城窟

釋子蘭

游客長城下飲馬長城窟馬嘶聞水腥為浸征人骨豈

不是流泉終不成潺湲洗盡骨上土不洗骨中冤骨若
不流水四海有還魂空流鳴咽聲聲中疑是言

關山月

張籍

秋月明朗關山上山中人馬蹄響關山秋來雨雪多
行人見月唱邊歌海邊漠漠天氣白胡兒夜度黃龍磧
軍中探騎暮出城伏兵暗處低旌戟漢水連天霜草平
野駝尋水磧中鳴隴頭風急鴈不下沙場苦戰多流星
可憐高國關山道年年戰骨多秋草

古長城吟

王翰

長安少年無遠圖一生唯羨執金吾
騏驎前殿拜天子走馬為君西擊胡
胡沙獵獵吹人面漢虜相逢不相見
遙聞鍾鼓動地來傳道單于夜猶戰
此時顧恩寧顧身為君一行摧萬人
壯士揮戈迴白日單于濺血染朱輪
迴來飲馬長城窟長城道傍多白骨
問之耆老何代人云是秦王築城卒
黃昏塞北無人煙鬼哭啾啾聲沸天
無罪見誅功不賞孤魂流落此城邊
當昔秦王按劍起

諸侯膝行不敢視富國彊兵二十年築怨興徭九千里
秦王築城何太愚天實亡秦非北胡一朝禍起蕭牆內
渭水咸陽不復都

長城作

鮑溶

蒙公虜生人北築秦氏冤禍興蕭牆內萬里防禍根城
成六國亡宮闕啓千門生人半為土何用空中原奈何
天下人骨肉尚酬恩投沙擁海水安得不久翻乘高慘
人魂寒日易黃昏枯骨貫折鐵沙中如有言萬古驪山

葬誰知野火燔

古築城曲

五首

元稹

年年塞下丁長作出塞兵自從冒頓強官築遮虜城
築城須努力城高遮得賊但恐賊路多有城遮不得
丁口傳父言莫問城堅否平城被虜圍漢斷城牆走
因茲請休和虜往騎來過半疑兼半信築城猶羨我
築城安敢煩願聽丁一言請築鴻臚寺兼愁虜出關

築城詞

張籍

築城去千人萬人齊抱杵重重土堅試行錐軍吏執鞭
催作遲來時一年深磧裏盡著短衣渴無水力盡不得
拋杵聲杵聲未定人皆死家家養男當門戶今日作君
城下土

築城詞二首

陸龜蒙

城上一培土手中千萬杵築城畏不堅堅城在何處
莫歎將軍逼將軍要却敵城高功不高爾命何勞惜

聽董大彈胡笳聲兼語弄寄房給事

李頎

蔡女昔造胡笳聲一彈一十有八拍胡人落淚向邊草
漢使斷腸對歸客古戍蒼蒼烽火寒大荒陰沉飛雪白
先拂商絃後角羽四郊秋葉驚撼撼董夫子通神明深
山竊聽來妖精言遲更速皆應手將往復旋如有情空
山百鳥散還合萬里浮雲陰且晴嘶酸鵲鷹失羣夜斷
絕胡兒戀母聲川為靜其波鳥亦罷其鳴烏珠部落家
鄉遠邏迤沙塵哀怨生出音變調忽飄灑長風吹林雨

墮瓦迸泉颯颯飛木末野鹿呦呦走堂下長安城連東
掖垣鳳凰池對青瑣門高才脫畧名與利日夕望君抱
琴至

唐文粹卷十二

欽定四庫全書

唐大粹卷十三

宋姚鉉編

詩丁 摠六十六首

樂府辭下

神仙十二

步虛詞十首 道士吳筠

步虛詞 高駢

夢上天

元稹

俠少十七

結客少年場

盧照隣

邯鄲少年行

鄭錫

邯鄲少年行

高適

少年子

李白

少年行二首

王維

少年詞

李百藥

少年行

張籍

少年行

崔國輔

俠客行

元稹

俠客行

李白

刺年少

李賀

古遊俠呈軍中諸將

崔顥

青樓曲

王昌齡

劍客

賈島

壯士吟

孟遲

結韞子

李白

行樂十三

楚宮行

張籍

上之回

李白

陽春歌

鼓吹入朝曲

白紵詞三首

冬白紵

元稹

相逢行

李白

古樂府

權德輿

朝來曲

王昌齡

將進酒

李白

將進酒

李賀

追悼一

李夫人

白居易

愁苦六

古別離 李端

古別離 孟郊

遊子吟 李益

遊子吟 孟郊

苦熱行 王穀

苦寒行 孟郊

鳥獸花卉十三

八駿圖

白居易

天馬歌

李白

紫騮馬

驄馬行

杜甫

猛虎行

李白

猛虎行

李賀

白虎行

烏棲曲

李白

烏夜啼

父如張

李賀

野田黃雀行

李白

採蓮曲

張籍

採蓮曲

李白

古城道路四

石城

鄭谷

沙路曲

李賀

沙堤行呈裴相公

張籍

洛陽陌

李白

步虛詞十首

道士吳筠

衆仙仰靈範肅駕朝神宗
金景相照曜逶迤昇太空
七玄已高飛火鍊生珠宮
餘慶逮天壤平和王道融
八威清遊氣十絕舞祥風
使我躋陽源其來自陰功
逍遙太霞上真鑒靡不通

逸轡登紫清乘光邁奔電
閭風隔三天俯視猶可見玉

闔標敞朗瓊林鬱葱菁自非挺金骨焉得諧夙願真朋
何森森合景恣遊宴良會忘淹留十齡纔一眄

三宮發明景朗照同鬱儀紛然馳飈欵上采空清蕤令
我洞金色後天耀瓊姿心協太虛靜寥寥竟何思玄中
有至樂淡泊終無為但與正真友飄飄散遨嬉

稟化凝正氣鍊形為真仙忘心符元宗返本協自然帝
一集絳宮流光出丹玄元英與桃君朗詠長生篇六府
煥明霞百闕羅紫煙飈車涉寥廓靡靡秉景遷不覺雲

路遠斯須遊萬天

扶桑誕初景羽蓋凌晨霞
脩欸造西域嬉遊金母家
碧津湛洪源灼爍敷荷花
煌煌青琳宮璨璨列玉華
真氣溢絳府自然思無邪
俯矜區中士天濁良可嗟

瓊臺劫萬仞孤暎大羅表
常有三素雲凝光自飛繞
羽童泛明霞升降何縹緲
鸞鳳吹雅音栖翔絳林標
玉虛無晝夜靈景何皎皎
一覩太上京方知衆天小

灼灼青華林靈風振瓊柯
三光無冬春一氣清且和
迴

首適結靈傾眸親曜羅豁落制六天流鈴威百魔絲絲
慶不極誰謂椿齡多

高情無侈靡遇物生華光至樂無簫歌金玉音琅琅或
登明真臺宴此羽景堂杳靄結寶雲霏微散靈香天人
誠遐曠歡泰不可量

爰從太微上肆覲虛皇尊騰我八景輿威遲入天門既
登玉宸庭肅肅仰紫軒敢問龍漢末如何闢乾坤怡然
輟雲璈告我希夷言幸聞至精理方見造化源

二氣播萬有化機無停輪而我操其端乃能出陶鈞寥
寥大漠上所遇皆清真澄瑩含元和氣同自相親絳樹
結丹實紫霞流碧津以茲保童嬰永用超形神

步虛詞

高 駢

青溪道士人不識上天下天鶴一隻洞門深鎖碧牕寒
滴露研朱點周易

夢上天

元 稹

夢上高高天高高蒼蒼高不極下視五嶽塊累累仰天

依舊蒼蒼色。蹋雲聳身身。更上攀天下。天攀未得西瞻。
若木免輪低。東望蟠桃海。波黑日月之光。不到此。非暗。
非明。煙塞塞天。悠地遠。身跨風下。無階梯上。無力來時。
畏有他人上。截斷龍胡。斬鵬翼。茫茫漫漫。方自悲哭。向
青雲惱。音叨素臆哭聲。厭咽。旁人惡喚起。驚悲淚飄露。千
慚萬謝。喚厭人。向使無君。終不寤。

結客少年場

盧照鄰

長安重遊俠。洛陽富才雄。玉劍浮雲騎。金鞭明月弓。關

雞過渭北走馬向關東孫賓遙見待郭解暗相通不受
千金爵誰論萬里功將軍下天上虜騎入雲中烽火夜
似月兵氣曉成虹橫行徇知己負羽遠征戎龍旌昏朔
霧烏陣卷寒風追奔瀚海咽戰罷陰山空歸來謝天子
何如馬上翁

邯鄲少年行

鄭錫

霞鞍金口騶豹袖紫貂裘家住叢臺下門前漳水流喚
人呈楚舞借客試吳鉤見說秦兵至甘心赴國讎

邯鄲少年行

高適

邯鄲城西遊俠子自言生長邯鄲裏千場縱博家仍富
數處報讎身不死宅中歌笑日紛紛門外車馬長如雲
未知肝膽向誰是令人却憶平原君君不見今人交態
薄黃金用盡還疎索以茲感歎辭舊遊更於時事無所
求且與少年飲美酒往來射獵西山頭

少年子

李白

青雲少年子挾彈章臺左鞍馬四邊開突如流星過金

九落飛鳥夜入瓊樓卧夷齊是何人獨守西山餓

少年行二首

王維

新豐美酒斗十千咸陽遊俠多少年相逢意氣為君飲
繫馬高樓垂柳邊

漢家君臣歡宴終高議雲臺論戰功天子臨軒賜侯印
將軍佩出明光宮

少年詞

李百藥

始酌文君酒新吹弄玉簫少年不歡樂何以盡芳朝千

金笑裏面一楊掌中腰掛冠豈憚宿迎拜不勝嬌寄語
少年子無辭歸路遙

少年行

張籍

少年從出獵長楊禁中新拜羽林郎獨到輦前射雙虎
君王手賜黃金璫日月鬪雞都市裏贏得寶刀重刻字
百里報讎夜出城平明還在倡樓醉遙聞虜到平陵下
不待詔書行上馬斬得名王獻桂宮封侯起第一日中
不為六郡良家子百戰始取邊城功

少年行

崔國輔

遺却珊瑚鞭白馬驕不行
章臺折楊柳春日路傍情

俠客行

元稹

俠客不怕死怕在事不成
事成不肯藏姓名我非竊賊
誰夜行白日堂堂殺袁盎
九衢草草人面青此客此心
歸海鯨海鯨露背橫滄溟
海波分作兩處生分海減海力
俠客有謀人莫測三尺鐵蛇延二國

俠客行

李白

趙家縵胡纓吳鉤霜雪明銀鞍照白馬颯沓如流星十
步殺一人千里不留行事了拂衣去深藏身與名閒過
信陵飲脫劍膝上橫將炙啖朱亥持觴勸侯嬴三盃吐
然諾五嶽倒為輕眼花耳熱後意氣素虵生救趙揮金
鉞邯鄲先震驚千秋二壯士烜赫大梁城縱死俠骨香
不慚世上英誰能書閣下白首太玄經

刺年少

李賀

青驄馬肥金鞍光龍腦入縷羅衣香美人狎坐飛瓊觴

貧人喚云天上郎別起高樓連碧篠絲曳紅鱗出深沼
有時半醉百花前背把金丸落飛鳥自說生來未為客
一身美妾過三百豈知斲地種田家官稅頻催沒人識
長金積玉誇豪毅每揖閒人多意氣生來不讀半行書
祇把黃金買身貴少年安得長少年海波尚變為桑田
枯榮遞傳急如箭天公豈肯為君偏莫道韶華鎮長在
白頭面皺專相待

古遊俠呈軍中諸將

崔顥

少年負膽氣好勇復知幾杖劒出門去孤城逢合圍殺
人遼水上走馬漁陽歸錯落金鎖甲蒙茸貂鼠衣還家
行且獵弓矢速如飛地迴鷹犬疾草深狐兔肥腰間帶
兩綬轉眼生光輝顧謂今日戰何如隨建威

青樓曲

王昌齡

白馬金鞍從武皇旌旗十萬宿長楊樓頭小婦鳴箏坐
遙見飛塵入建章馳道楊花滿御溝紅粧綬綰上青樓
金章紫綬千餘騎夫婿朝迴初拜侯

劍客

賈島

十年磨一劍霜刃未曾試今日把似君誰有不平事

壯士吟

孟遲

壯士何曾悲悲即無迴期如何易水上未歌先淚垂

結襪子

李白

燕南壯士吳門豪筑中置鉞魚隱刀感君恩重許君命

太山一擲輕鴻毛

楚宮行

張籍

章華宮中九月時桂花半落紅橘垂江頭騎火照輦道
君王夜從雲夢歸霓旌鳳蓋到雙闕臺上重重歌吹發
千門萬戶開相當燭籠左右列成行下輦更衣入洞房
洞房侍女盡焚香玉階羅幕微有霜齊言此夕樂未央
玉酒湛湛盈華觴絲竹次第鳴中堂巴姬起舞向君王
迴身垂手結明璫願君千年萬年壽朝出射麋夜飲酒

上之回

李白

三十六離宮樓臺與天通閣道步行月美人愁煙空思

踈寵不及桃李傷春風淫樂意何極金輿向回中萬乘
出黃道千旗揚彩虹前軍細柳北後騎甘泉東豈問渭
川老寧邀襄野童秋暮瑤池宴歸來樂未窮

陽春歌

長安白日照春空綠楊結煙垂裊風披香殿前花始紅
流芳發出繡戶中繡戶中相經過飛燕皇后輕身舞紫
宮夫人絕世歌聖君三萬六千日歲歲年年柰樂何

鼓吹入朝曲

金陵控海浦淥水帶吳京
鏡歌列騎吹颯沓引公卿
搥鍾速嚴犂伐鼓啟重城
天子憑玉几劔履若雲行
日出照萬戶簪裾爛明星
朝罷沐浴閒遨遊閭風亭
濟濟雙闕下歡娛樂恩榮

白紵詞三首

揚清歌發皓齒北方佳人東鄰子
且吟白紵停綠水長袖拂面為君起
寒雲夜卷霜海空胡風吹天飄塞鴻玉
顏滿堂樂未終館娃日落歌吹濛

月寒江清夜沉沉美人一笑千黃金垂羅舞榭揚哀音
郢中白雪且莫吟子夜吳歌動君心動君心冀君賞願
作天池雙鴛鴦一朝飛去青雲上

吳刀剪綵縫舞衣明粧麗服奪春輝揚眉轉袖若雪飛
傾城獨立世所稀激楚結風醉忘歸高堂月落燭已微
玉釵挂纓君莫違

冬白紵

元稹

吳宮夜長宮漏款簾幕四垂燈焰暖西施自舞王自管

雪紆翻翻鶴翎散

上聲

促節牽繁舞腰軟舞腰軟王罷飲

蓋覆西施鳳花錦身作牀臂為枕朝珮攄攄王晏寢醒
來閣門報無事子胥死後言為諱近王之臣諭王意共
笑越王窮惴惴夜夜抱冰寒不睡

相逢行

李白

朝騎五花馬謁帝出銀臺秀色誰家子雲車珠箔開金
鞭遙指點玉勒近遲回交轂相借問疑從天上來感入
青綺門當歌共銜盃銜盃映歌扇似月雲中見相見不

得親不如不相見相見情已深未語可知心胡為守空
閨孤眠愁錦衾錦衾與羅帷纏綿會有時春風正澹蕩
暮雨來何遲後因三青鳥更報長相思光景不待人須
更髮成絲當年失行樂老去徒傷悲持此道密意毋令
曠佳期

古樂府

權德輿

光風澹蕩百花吐樓上朝朝學歌舞身年二八壻侍中
幼妹承恩兄尚主綠窻珠箔繡鴛鴦侍婢先焚百和香

鷺啼日出不知曙寂寂羅幃春夢長

朝來曲

王昌齡

日昃鳴珂動花連繡戶春盤龍玉臺鏡唯待畫眉人

將進酒

李白

君不見黃河之水天上來奔流到海不復迴君不見高
堂明鏡悲白髮朝如青絲暮如雪人生得意須盡歡莫
使金樽空對月天生我材必有用千金散盡還復來烹
羔宰牛且為樂會須一飲三百盃岑夫子丹邱生與君

歌一曲請君為我聽鍾鼎玉帛不足貴但願長醉不願醒古來賢達皆寂寞惟有飲者留其名陳王昔時宴平樂斗酒十千恣歡謔主人何為言少錢且須沽酒對君酌五花馬千金裘呼兒將出換美酒與爾同銷萬古愁

將進酒

李賀

瑠璃鍾琥珀濃小槽酒滴真珠紅烹龍炮鳳玉脂泣羅幃翠幕圍春風吹龍笛擊鼉鼓皓齒歌細腰舞況是青春日將暮桃花亂落如紅雨勸君終日酩酊醉酒不到

劉伶墳上土

李夫人

白居易

漢武帝初喪李夫人夫人病時不肯別死後留得生前
恩君恩不盡念未已甘泉殿裏令寫真丹青畫出竟何
益不言不笑愁殺人又令方士合靈藥玉釜煎煉金爐
焚九華帳深夜悄悄反魂香降夫人魂夫人之魂在何
許香煙引到焚香處既來何苦不須更縹緲悠揚還滅
去去何速分來何遲是耶非耶兩不知翠蛾髮髻平生

貌不似昭陽寢疾時魂之不來君心苦魂之來兮君亦
悲背燈隔帳不得語安用暫來還見違傷心不獨漢武
帝自古及今皆若斯君不見穆王三日哭重璧臺前傷
盛姬又不見秦陵一掬淚馬嵬坡下念楊妃縱令妍姿
豔質化為土此恨長在無銷期生亦惑死亦惑凡物惑
人忘不得人非木石皆有情不如不遇傾城色

古別離

李端

水國葉黃時洞庭霜落夜行舟聞商賈宿在楓林下此

地送君還茫茫似夢間後期知幾日前路轉多山巫峽
通湘浦迢迢隔雲雨天晴見海檣月落聞津鼓人老自
多愁水深難急流清宵歌一曲白首對汀洲

古別離

孟郊

松山雲繚繞萍路水分離雲去有歸日水分無合時春
芳役雙目春色柔四支楊柳織別愁千條萬條絲

遊子吟

孟益

女羞夫婿薄客恥主人賤過逢同衆流低迴愧相見君

非青銅鏡何事空照面莫以衣上塵不謂心如練人生
當榮盛待士勿言倦君看白日馳不異弦上箭

遊子吟

孟郊

慈母手中線遊子身上衣臨行密密縫意恐遲遲歸誰
言寸草心報得三春暉

苦熱行

王穀

祝融南來鞭火龍火旗焰焰燒天紅日輪當午凝不去
萬國如在洪爐中五嶽翠乾雲彩滅陽侯海底愁波竭

何當一夕金風發為我掃却天下熱

苦寒行

孟郊

天色寒青蒼北風呌枯桑厚冰無裂文短日有冷光敲石不得火壯陰奪正陽苦調更何言久吟成此章

八駿圖

白居易

穆王八駿天馬駒後人愛之寫為圖背如龍兮頸如象骨竦筋高脂肉壯日行萬里疾如飛穆王獨乘何所之四荒八極蹋欲徧三十二蹄無歇時屬車軸折趨不及

黃屋草生棄若遺瑤池西赴王母宴七廟經年不親薦
璧臺南與盛姬遊明堂不復朝諸侯白雲黃竹歌聲動
一人荒樂萬人愁周從后稷到文武積德累功世勤苦
豈知纔及四代孫心輕王業如灰土由來尤物不在大
能蕩君心即為害文帝却之不肯乘千里馬去漢道興
穆王得之不為戒八駿駒來周室壞至今此物世稱珍
不知房星之精下為怪八駿圖君莫愛

天馬歌

李白

天馬來出月氏窟背為虎文龍翼骨嘶青雲振綠髮蘭
筋權奇走滅沒騰崑崙厯西極四足無一蹶雞鳴刷燕
哺秣越神行電邁躡慌惚天馬呼飛龍趨目明長庚臆
雙鳬尾如流星首渴烏口噴紅光汗溝珠曾陪時龍躍
天衢羈金絡月照皇都逸氣稜稜凌九區白壁如山誰
敢沽迴頭笑紫燕但覺爾輩愚天馬奔戀君軒駉躍驚
矯浮雲翻萬里足躑躅遙瞻閭闔門不逢寒風子誰採
逸景孫白雲在青天邱陵遠崔嵬鹽車上峻坂倒行逆

施畏日晚伯樂翦拂中道遺少盡其力老棄之願逢田
子方惻然為我悲雖有玉山禾不能療苦饑嚴霜五月
凋桂枝伏櫪銜冤摧兩眉請君贖獻穆天子猶堪弄影
舞瑤池

紫騮馬

紫騮行且嘶雙鬣碧玉蹄臨流不肯渡似惜錦障泥白
雪關山遠黃雲海樹迷揮鞭萬里去安得念春閨

驄馬行

杜甫

鄧公馬癖人共知初得花驄大宛種夙昔傳聞思一見
牽來左右神皆竦雄姿逸態何嶄崿顧影驕嘶自矜寵
兩目清瑩夾鏡懸肉駿礪礪連錢動朝來久試華軒下
未覺千金滿高價赤汗微生白雪毛銀鞍却覆香羅帕
卿家舊賜公取之天廐真龍此其亞晝洗須騰涇渭深
朝趨可刷幽并夜吾聞良驥老始成此馬數年人更驚
豈有四蹄疾於鳥不與八駿俱先鳴時俗造次那得致
雲霧晦冥方降精近聞下詔喧都邑肯使騏驎地上行

猛虎行

李白

朝作猛虎行暮作猛虎吟腸斷非關隴頭水淚下不為
雍門琴旌旗繽紛兩河道戰鼓驚山欲傾倒秦人半作
燕地囚胡馬翻嚙洛陽草一輸一失關下兵朝降夕叛
幽冀城巨鼇未斬海水動魚龍奔走安得寧頗似楚漢
時翻覆無定止朝過博浪沙暮入淮陰市張良未遇韓
信貧劉項存亡在兩臣暫到下邳受兵略來投漂母作
主人賢哲栖栖古如此今時亦棄青雲士有策不敢犯

龍鱗竄身南國避胡塵寶書長劔挂高閣金鞍駿馬散
故人昨日方為宣城客掣鈴交通二千石有時六博快
壯心遶牀三匝呼一擲楚人每道張旭奇心藏風雲世
莫知三吳邦伯皆顧盼四海雄俠兩追隨蕭曹曾作沛
中吏攀龍附鳳當有時漂陽酒樓三月春楊花茫茫愁
殺人胡雛綠眼吹玉笛吳歌白紵飛梁塵丈夫相見且
為樂槌牛撾鼓會衆賓我從此去釣東海得魚笑寄情
相親

猛虎行

李賀

長戈莫揜彊弩莫抨乳孫哺子教得生獍舉頭為城掉
尾為旌東海黃公愁見夜行道逢騶虞牛哀不平何用
尺刀壁上雷鳴泰山之下婦人哭聲官家有程吏不敢
聽

白虎行

火鳥日暗崩騰雲秦皇虎視蒼生羣燒書滅國無暇日
鑄劍佩玦唯將軍王壇設醯思沖天一世二世當萬年

燒丹未得不死藥，擎舟海上尋神仙。
鯨魚張鬣海波沸，耕人半作征人鬼。
雄豪氣猛如蛟煙，無人爲決天河水。
誰最苦？兮誰最苦？報人義士深相許。
漸離擊筑荆卿歌，荆卿把酒燕丹語。
劍如霜兮膽如鐵，出燕城兮望秦月。
天授秦風祚未終，袞龍衣點荆卿血。
朱旗卓地白蛇死，漢皇却是真天子。

烏棲曲

李白

姑蘇臺上烏棲時，吳王宮裏醉西施。
吳歌楚舞歡未畢，

青山猶銜半邊日
銀箭金壺漏水多
起看秋月墜江波
東方漸高柰爾何

烏夜啼

黃雲城邊烏欲棲
歸飛啞啞枝上啼
機中織錦秦川女
碧紗如煙隔窻語
停梭悵然憶遠人
獨宿孤房淚如雨

艾如張

李賀

錦檐榆繡檔
襦彊彊啄食哺爾鵲
東卧穠滿風雨莫
逐良媒壟西去
齊人織網如素空
張在野田平碧中
網

絲漠漠無形影誤爾觸之傷首紅艾葉綠花誰翦刻中
藏禍機不可識

野田黃雀行

李白

遊莫逐炎洲翠棲莫近吳宮燕炎洲逐翠遭網羅吳宮
火起焚爾窠蕭條兩翅蓬蒿下縱有鷹鷂奈爾何

採蓮曲

張籍

秋江岸邊蓮子多採蓮女兒凭船歌青房圓實齊戢戢
爭前競折漾微波試索綠莖不尋藕斷處絲多刺傷手

白練束腰袖半卷不挿玉釵粧梳淺舫中未滿渡前洲
借問阿誰家住遠歸時共待暮潮上自弄芙蓉還蕩槳

採蓮曲

李白

若耶溪傍採蓮女笑倚荷花共人語日照新粧水底明
風飄香袖空中舉岸上誰家遊冶郎三三五五映垂楊
紫騮嘶入落花去見此踟躕空斷腸

石城

鄭谷

石城昔為莫愁鄉莫愁魂散石城荒江人依舊棹舴艋

江岸還飛雙鴛鴦帆去帆來風浩渺花開花謝春悲涼
煙濃草遠望不盡千古漢陽間夕陽

沙路曲

李賀

柳陰半眠丞相樹珮馬玎玲蹋沙路斷燼遺香裊翠煙
獨騎鳴蹄上天去帝家玉龍攢九關帝前簪笏稱南山
獨垂重印押千官金科篆字紅屈盤沙路歸來聞好語
早火不光天下雨

沙隄行呈裴相公


張籍

長安大道沙為隄旱風無塵暖無泥宮中玉漏下三刻
朱衣導騎丞相來路傍高樓息歌吹千車不行行者避
街官閤吏相傳呼宮前十里唯空衢白麻詔下移相印
新隄未成舊隄盡

洛陽陌

李白

白玉誰家郎迴車渡天津看花東陌上驚動洛陽人



唐文粹卷十三